

ԸՆԴԴԻՍԱԽՈՍԱԿԱՆ ԿԱՐԾԻՔ

Տիգրան Ալեքսանյանի «Բերդի տարածաշրջանի միջնադարյան ամրաշինական համակարգը» խորագրով, Է.00.03. «Հնագիտություն» մասնագիտությամբ պատմական գիտությունների թեկնածուի գիտական աստիճանի ատենախոսության վերաբերյալ

Պաշտպանական համակարգերը շատ հին պատամություն ունեն։ Այն նստակյաց քաղաքակրթությունների կենսապահովման և անվտանգության ամենահիմնական և կայուն միավորներից են։ Կառուցողական-ճարտարապետական առումով դրանք արտացոլում են ժամանակի ռազմական ու շինարարական մտքի ամենակարևոր դրսևորումներից մեկը՝ ամենամեծ հնարավորություններն ունենալով ձևակերպել և փոփոխել մշակութային լանդշաֆտը նույնիսկ տասնյակ և հարյուրավոր կիլոմետրերի վրա։ Բրոնզ-երկաթեդարյան ամրապատերն ու բերդշենները, ուրարտական և հելլենիստական դասական քաղաքներն ու ամրոցները, որ նախորդել են միջնադարին և երբեմն էլ ներառվել հետագույն պաշտպանական կառույցների մեջ, ըստ էության ցուցադրում են հայաստանյան այն քաղաքակրթական շարքը, որ անվտանգության, ռազմական ստրատեգիայի ու տակտիկայի, զինտեխնիկայի, արհեստների դրսևորումներն են և մի անգամ չէ, որ արժանացել են հետազոտողների ուշադրությանն ու երբեմն էլ մանրամասն քննությանը։

Այսուհանդերձ, միջնադարյան պաշտպանական համակարգերը, որ հայ հանրության քաղաքական կացության, անկախության կամ դրա բացակայության անմիջական արտացոլումներն են, թե՛ կոնկրետ և թե՛ ընդհանուր-տարածքային առումով դեռ մնում են խիստ պակաս հետազոտված։ Եթե քաղաքների, գյուղաքաղաքների դեպքում դրանք ավելի հստակ են մեզ ներկայանում, ապա առանձին ամրոցների, դրանց տարատեսակների, պաշտպանական փոխհարաբերությունների տեսասկետից մնում են շատ քիչ հետազոտված։ Եվ եթե արտաքին նկարագրությունների, եզակի դեպքերում հատակագծային կամ չափագրական ինչ-որ նյութեր կան, ապա հնագիտական լիարժեք հետազոտությունների մասին, չնչին բացատրությամբ, կարելի է խոսել միայն վերջին տարիներին։

Եվ հենց այս տեսակտից է, որ Տիգրան Ալեքսանյանի ընտրած «Բերդի տարածաշրջանի միջնադարյան ամրաշինական համակարգը» հետազոտությունը հատաուկ նորությային և գիտական կարևորություն ունի: Հետագայում, երբ հրատարակման խնդիր դրվի՝ ես կառաջարկեի այն վերնագրել «Բերդի տարածաշրջանի զարգացած միջնադարյան ամրաշինական համակարգերը», քանի որ մի քանի չնչին բացառություններով, ատենախոսությունը ներկայացնում է հենց 10-13-րդ դարերի կառույցներն ու նյութական մշակույթը և, իհարկե, ողջ չորս դարերի համար դժվար է պատկերացնել միայն մեկ համակարգի գոյությունը, թեկուզ և սահմանափակ մի տարածքի վրա:

Աշխատանքը բաղկացած է ներածությունից, չորս գլուխներից, եզրակացություններից, գրկանաության ցանկից և պրոֆեսիոնալ մակարդակով պատրաստված լայնածավալ հավելվածից:

Ներածության մեջ, ինչպես որ նման դեպքերում է, ներկայացվում են արդիականությունը, նպատակն ու խնդիրները, հետազոտության մեթոդաբանությունը, տարածաշրջանի համառոտ պատմա-աշխարհագրական բնութագիրը, թեմայի ուսումնասիրման պատմությունը (էջ 3-11): Հատուկ ուզում եմ ընգծել մեթոդաբանություն բաժինը, ուր հեղինակը հավասարաչափ կարևորում է մատենագրական և արձանագրական սկզբնաղբյուրները, հնագիտական դաշտային հետազոտություններն ու հնագիտական նյութի քննությունը, չափագրական և տեղագրական հանույթների կազմումը և այլն: Սպասելի էր, որ հեղինակը կներկայացնի նաև թե ինչ մեթոդներով և չափանիշներով է քննելու և վերականգնելու իր իսկ անվանած համակարգը: Սակայն այն բացակայում է: Գուցե դա համալրվի հետագայում, մանավանդ որ երրորդ և չորրորդ գլուխներում և եզրակացություններում խոսվում է այդ մասին:

Ատենախոսության առաջին գլուխը, որ վերնագրված է «Միջնադարյան ամրոցների ուսումնասիրությունը», առկա նյութերի հիմամբ ներկայացվում են Նոր բերդ, Կածարեթ, Երգեվանք, Մաճնաբերդ ամրոցները: Ուշագրավ է, որ ամրոցների նկարագրությանը նախորդում է տարածաշրջանի համառոտ քաղաքական

պատմությունը: Հատուկ շեշտենք, որ ատենախոսը հստակորեն սահմանազատում է Բագրատունյաց, սելջուկյան, Զաքարյան և մոնղոլական ժամանակաշրջանները, որոնք հաճախ ներկայացվում են տարբեր ամբողջությունների հիշատակմամբ ու դրանց դերակատարումների ցուցմամբ: Հետագա քննություններում հեղինակը մի անգամ չէ, որ փորձում է այս կամ այն ամբողջությունը կամ նրա որևէ բաղադրիչը կապել այդ ժամանակաշրջանների հետ, բայց ընդհանուր առմամբ տարբեր ժամանակների պաշտպանական համակարգերի տարբերակման տեսակետից նշյալ ամբոցների մերօրյա մնացորդները դեռ մեծ հնարավորություններ չեն տալիս:

Որպես կանոն, սկզբնաղբյուրների և տեղագրական նկարագրությունները և սեփական դաշտային դիտարկումների շնորհիվ ճշգրտվում են դրանց անունները, ներկայացվում կոորդինատները, նկարագրվում են դրանց բնական անառիկ դիրքը, որպես կանոն վավերացվում ամրապատերի և ջրամբարի մնացորդները: Հատուկ նշելի է Մածնաբերդի տեղադրության հստակեցման մանրամասն և համոզիչ քննությունը, Հայկ Եսայաին պեղումներով հայտնաբերված հնագիտական նյութի ներկայացումը (էջ 26-29):

Միանգամայն այլ է Տավուշ բերդի հանգամանքը, որի բազմակողմանի՝ աղբյուրագիտական, տեղագրական, ամրաշինական և հնագիտական քննությունը կազմում է սույն ատենախոսության առանցքը: Ինչպես իրավացիորեն վավերացնում է ատենախոսը. «Ի տարբերություն մյուս հուշարձանների, այն տարածաշրջանի միակ ամրոցն է, որը մեծամասամբ պեղվել է, հանգամանակից ուսումնասիրվել են կառուցման սկզբունքները, շինարարական փուլերը, մշակութային շերտերը, պեղումներով հայտնաբերված հնագիտական նյութերը և այլն: Տավուշ բերդն առանձնանում է նաև պահպանվածությամբ, չափերով, ինչպես նաև ժամանակի քաղաքական, մշակութային կյանքում ունեցած դերով: Տավուշ ամրոցում իրականացված հնագիտական ուսումնասիրությունների արդյունքները հանդիսանում են ատենախոսության ատաղձը, որոնք կարևոր են ոչ միայն քննվող տարածաշրջանի ամրաշինական համակարգի ուսումնասիրության, այլև մշակութային կյանքի, առևտրական կապերի, կենցաղի և արհեստների ուսումնասիրության համար»:

Երրորդ գլուխը, որ վերնագրված է «Բերդի տարածաշրջանի միջնադարյան պաշտպանական համակարգը» եւ համարում եմ տեսական ու մեթոդական լուրջ ձեռքբերում: Քանի որ այն փորձում է առաջին երկու գլուխների վավերացումները դասդասել, կանոնակարգել և վերստեղծել շատ ավելի ընդհանուր մի պատկեր և պատասխանել այն հիմնական հարցին, թե ի վերջո արդյո՞ք խոսք է գնում պաշտպանական մի ամբողջական համակարգի մասին, ինչպես համոզված է հետազոտողը, և որոնք են նման եզրակացության փաստական տվյալները: Ինչպես նշում է աստենախոսը, խոսք է գնում մի համակարգի մասին, որն ունի կենտրոնական կամ գլխավոր ամրոց և նրա շուրջը կամ մատույցներում տեղակայված ավելի փոքր ամրոցներ, որոնք իրենց վրա են վերցնում առաջին հարվածը և նաև զգուշացման-ահագանգի գործառույթ իրականացնում (էջ 66-68): Ըստ հեղինակի բերած զուգահեռների այն ունիվերսալ դասական մի համակարգ է, որ այս կամ յան չափով վավերացվում է Հայաստանի տարբեր տարածաշրջաններում՝ Շիրակ, Սյունիք, Արցախ և այլն: Ես սա համարում եմ խիստ ուշագրավ, բայց և հայտնի չափով դեռ հիպոթետիկ եզրահանգում: Եվ դա բնական է, երբ գործ ունենք հայկական նյութի հիմամբ տեսականորեն դեռ չմշակված և մեթոդաբանորեն ոչ մինչև վերջ հստակեցված մոտեցումների հետ, ինչը, նորից շեշտեմ, բնական է նախնական բնույթի քննություններում:


Ասվածը վերաբերում է և ամրոց, բերդ, դղյակ եզրերի քննությանը: Դրանց տակ պիտի դնել զուտ պաշտպանական-ճարտարապետական, թե նաև սոցիալ-քաղաքական իմաստ ու գործառույթ: Սա մի խնդիր է, որ դեռ դրվում է որպես հարցադրում (էջ 69-72) և հետագա քննության կարիք ունի նոր հետազոտությունների հիմամբ: Կարող ենք վավերացնել, որ Տիգրան Ալեքսանյան բացել է մի շատ ուշագրավ և բարդ թեմա, որի համապարփակ հետազոտությունն ըստ էության դեռ սկզբնական փուլում է:

Եվ իհարկե, զուտ հնագիտական տեսակետից առանձնանում է չորրորդ գլուխը, ուր հեղինակը ներկայացնում է տարածաշրջանի պեղումներով ու պատահականորեն հայտնաբերված միջնադարյան հնագիտական նյութը. պեղումների ընթացքը, գտածոների տիպաբանությունը, զուգահեռներն ու ժամանակագրությունը:

օղալուսանկարները, ճարտարապետական կառույցների չափագրությունները, լուսանկարները, որոնք ներառված են 66 էջ կազմող հավելվածում:


Եզրակացնենք: Սա ակնհայտորեն նոր և ուշագրավ աշխատանք է, աշխատանք, որ կատարվել է ոչ միայն աղբյուրների ու առկա հետազոտությունների գերազանց իմացությամբ, այլ նաև սեփական դիտարկումների, դաշտային քննությունների և հատկապես հնագիտական պեղումների մանրամասն մասնագիտական քննությամբ: Եթե թույլ տրվի, ես այն կանվանեի նաև պիոներական աշխատանք, մեծ գործի առաջին մեծ և լուրջ քայլը: Որին կարծում եմ հետևելու են Հայաստանի տարբեր շրջաններում համանման հետազոտությունները:

Իմ արած դիտարկումները շատ ավելի ցանկություններ են և որևէ կերպ չեն ստվերում կատարված աշխատանքի գիտական արժանիքները: Եվ համառոտված եմ, որ հեղինակը միանգամայն արժանի է իր հայցած՝ պատմական գիտությունների թեկնածուի գիտական աստիճանին:

Պաշտոնական ընդդիմախոս՝  Համլետ Պետրոսյան, պ. գ. դ., պրոֆեսոր

Պ. գ. դ., պրոֆեսոր Համլետ Պետրոսյանի ստորագրությունը հաստատում եմ՝

ՀՀ ԳԱԱ Հնագիտության և ազգագրության ինստիտուտի

փոխտնօրեն  Տոր Դավթյան



02 փետրվարի 2026 թ.